

# Tge vul dir la dumengia?

Patratgs per la votaziun federala

DA GUIU SOBIELA-CAANITZ

**■ Il repaus emnil è ina conquista sociala, e quai en ils dus senns dal pled «social». D'ina vart metta'l tuts umans sin il medem stgalim. Aregar il settavel di scumonda il segund cudesch da la Bibla: «Na fa quel di nagina lavur - ni ti, ni tes figl, ni tia figlia, ni tes famegl, ni tia fantschella, ni tes muvel, ni l'ester che sa chatta aifer tias portas!» (Exodus, 20, 10). Il famegl ed il giast, anzi, il muvel dua-in pia pussar gist sco mamma, bab e lur uffants. Da l'autra vart vala il paus per l'entira populaziun; lur han ins peda per tgirar la cuminanza cun conumans d'autras famiglias e chasad. Il scriptur gidieu André Chouraqui (\*1917), traductor da la Bibla e dal coràn en franzos, ha deditgà in chapitel da ses cudesch davart ils diesch cumandaments biblics (1) al senn dal quart davart il «settavel di» en las relijuns dal mund.**

## In cumandament nov

Chouraqui pon ins cumpareglier cun dus teologs renumads en il mund germanofon: Martin Buber (1878–1965) e Hans Küng (\*1928). Chouraqui ha translatà il Veder Testament en franzos, sco che Buber l'ha translatà en tudestg; domadus han sa sfurzads da reproducir il ritmus ebraic en il linguatg european. Buber aveva frequentà in gimnasi polac, gudagnond ina tscherta distanza visavi ses linguatg matern tudestg. Chouraqui, naschè e creschè si en l'Algeria, discurriva arab dialectal sper il franzos da scola ed ha emprendi l'arab da standard, lingua dal coràn. Sco Hans Küng ch'el citescha pliras giadas, manegia era Chouraqui che la carstgaunadad basegnia in'etica mondiala per surviver. L'emprim fa'

endament ch'il pajanissem antic n'haja betg enconuschì il ciclus regular ed ordinà da la lavour e dal paus: «La religiun romana discurriva da „dies fas“ [dis lubids, G. S.-C.] e „dies nefas“ [dis scumandads u da cordoli, G. S.-C.], ma senza fixar lur repetiziun tenor intervals regulars. Pli manavel dal giudaissem ha la cultura da Babilonia (...) dà il status da dis scumandads a quels da glina plaina u nova (...). Lezs dis ristgavan ils Babilonais strusch d'ir sur la sava da lur chasas. Ins cartevo ch'ils demunis sgolian tranter tschiel e terra en las notgs da glina plaina, mazzond tgi ch'i entaupian» (pp. 116–117).

## Aavar ed esser

Il scumond da lavourar il settavel di statgia en il segund cudesch biblic, ma il tschintgavel agiunscha in'admoniziu ch'al dat in senn pli profund: «Tegna endament che ti es stà famegl en l'Egipta e ch'il Segner Dieu t'ha manà nauadora!» (Deuteronom, 5, 15). L'Egipta simbolisescha enina la sclavaria e sia paja en naturalias, numnadama in las mangiativas: «Ils Israelits han puspè entschavì a planscher, schend: „Be cha nus avessan charn da mangiar! Nus ans regurdain dals peschs che nus mangiavan per nagut en l'Egipta, da las cucumeras e melonas, dals pors, las tschagulas e l'agl» (Numeri, 11, 4–5). Chouraqui manegia ch'il consum falsifgeschia adina dapli il senn da la recreaziun: «Las vacanzas ed il temp liber, uschè necessaris per il paus e la schluccada, vegnan oz da las giadas degradads da bleras pretensiuns da nossa vita. Savens emblid'ins la finamira dal paus e da la suspensiun festiva da la lavour. L'essenza dal temp liber ha sa midada; el è vegnì in product da consum (...). L'instituziun dal sabat avant passa traiamilli onns era in luxus en in

mund nua che sclavs faschevan l'entira lavour (...). Il temp liber sa esser secund mo sch'ins mida il ritmus; en quest senn ans stimuluscha il paus dal settafel di (...). Il quart cumandament ans fa endament che nus nun avain atgnomain nagut sin il mund; el ans stimuluscha da stgamiar periodicamain l'avair per l'esser, da renunziar a noss regl da prender possess per far in alianza cun Dieu (...). Il temp liber dispensescha da lavourar. El lubescha da guardar pli objectivamain sin sasez e sin Dieu. En l'avegnir crescha il temp liber. Nus duain spitgar che la dischoccupaziun augmentia, perquai ch'i dat adina dapli maschinas, robots, indrizs electronics (...). Lezza suspensiun da l'activitat (...) n'astga betg esser ina vercla per emblidar sasez en in'airradad tschorva. Qua san las pliras culturas umanas vegnir perina; i pregian l'access ad ina pasch interna che resultia da concentraziun, meditaziun ed enconscienschda da sasez» (pp. 124–126).

## Per amur da famegl e fantschella

Quai ha scrit Chouraqui per noss 21avel tschientaner. In patratg nov n'è quai atgnomain betg. Igl è remartgabel ch'in teolog giudaic ha già scrit en il medem senn a l'entschatta dal tschientaner passà, cun pleuds destinads directamain per ses concorrents germanofons, ma che commovan profunda in tgi ch'als legia en 2005 cun in'autra cardientscha. Rabin Leo Baeck (1873–1956) ha publitgà 1905 «Das Wesen des Judentums» perquai ch'el regardava «Das Wesen des Christentums» dal teolog Adolf von Harnack (1851–1930) sco malgist envers il giudaissem. Baeck leva pia defender sia religiun en in temp nua ch'igl era bainvesi da la snegar per sa far battegiar. 1921 è cumparida ina seconda ediziun

fitg schlargiada che resguardava dapli la mistica giudaica. L'autur fundava sia teologia sin ils dus pols «misteri» e «cumandament». Sco gidieu liberal definiva'l ils cumandaments «chametgs che cumparan mintgatant, sco entruidaments per l'acziun, tras ils niveis che curclan il misteri divin (...). Baeck era persvas ch'ins cuntanschia la devoziu-sadad ademplind las obligaziuns transer umans» (2). Quai ch'el scriva dal sabat fa endament il pled da Jesus: «Il sabat è fatg per l'uman, na l'uman per il sabat» (Marc, 2, 27). Baeck: «Dieu cumonda il sabat per amur dal sclav. Il sabat emnil datti sco dretg uman, (...) sco in dretg religius dal sclav, in dretg ch'ins n'astga betg reducir» (3). Cun pleuds moderns vul quai dir ch'er il famegl e la fantschella, sco commembres equals da la societat, han il dretg da far part da questa societat quel di da l'emna ch'ella è formada d'umans libers.

## Umans libers per la societat civila

Lez aspect social da la dumengia para in pau emblidà en la discussiun da las davosas emnas davart la midada da la lescha da lavour, en votaziun ils 27 da november. Ina stirpa, partida, uniu u grupper vul sa rimnar per deditgar in di da cuminanza ad in'activitat u in pasatemp cuminaivel. Tge di da l'emna vegn en dumonda? Il pli savens la dumengia, l'unic liber per la plira glieud. I constat ch'i dat excepziuns; il comité da referendum punctuescha: «Tgirunzas e tgirunzs, polizistas e polizists, locomotivistas e locomotivists (...) ed autres personas ston lavourar er la dumengia - per il bain da la publicidad. E nagiun n'ha nagut encunter ch'ins po cumprar la dumengia il pli important per la vita da mintga di en staziuns u en auters centers da viadi.» Ma cun las regulaziuns relativas en vigur resta la du-

1) André Chouraqui, *Les Dix Commandements aujourd'hui*. Ediziun da satg. Paris (Pocket, ISBN 2-266-11947-8) 2005.

2) Encyclopaedia Judaica, tom 4. Gerusalem (Keter) senza data. Chavazzin «Baeck, Leo», p. 78.

3) Leo Baeck, *Das Wesen des Judentums*. 7avla ediziun. Wiesbaden (Fourier) senza data, p. 224.